

67. fundur Breiðafjarðarnefndar, haldinn 13. mars 2006 í Stykkishólmi

Mættir: Friðjón Þórðarson formaður, Guðríður Þorvarðardóttir varaformaður, Ásgeir Gunnar Jónsson, Magnús A. Sigurðsson, Sigurður Þórólfsson, Þórólfur Halldórsson, Eiríkur Snæbjörnsson og Róbert A. Stefánsson.

Fundarritari: Sigríður E. Elisdóttir.

Fundur var settur kl. 11:00.

DAGSKRÁ FUNDARINS

Fundargerð 66. fundar

Afgreiðsla: Fundargerðin var lesin upp og samþykkt.

Hitaveita í Grundarfirði – Ákvörðun um matsskyldu

Lagt var fram afrit af bréfi Skipulagsstofnunar til Orkuveitunnar, dags. 8. febrúar 2006.

Afgreiðsla: Ekki voru gerðar athugasemdir við ákvörðun Skipulagsstofnunar.

Aðalskipulag Dalabyggðar og Vesturbyggðar

Erindi Landmótunar, dagsett 1. febrúar 2006 og 10. febrúar 2006 voru lögð fram til afgreiðslu.

Afgreiðsla: Varðandi tillögu að aðalskipulagi fyrir Dalabyggð gerir Breiðafjarðarnefnd eftirfarandi athugasemdir:

Varðandi kafla 4.5.2. um virkjanir á bls. 17 í forsendum með skipulagstillögunni vísar Breiðafjarðarnefnd í svarbréf sitt til Straumeyjar, dags. 11. apríl 2005, um sjávarfallavirkjun í landi Straums og bendir jafnframt á að hugmyndir hafa verið uppi um fleiri sjávarfallavirkjanir í mynni Hvammsfjarðar.

Á bls. 38 í meðfylgjandi forsendum er talað um að Breiðafjörður sé *friðlýstur* skv. lögum en hið rétta er að Breiðafjörður *njóti verndar* skv. lögum um vernd Breiðafjarðar nr. 54/1995.

Á sömu blaðsíðu er talað um að Breiðafjörður skeri sig úr þar sem hann sé "langstærsti eyja- og skerjagarður landsins". Eðlilegra væri að tala um að svæðið skeri sig úr vegna óteljandi eyja, hólma og skerja.

Rétt er að nefna svæði sem njóta verndar skv. öðrum lögum, t.d. friðlýst æðarvörp og arnarsetur á grundvelli laga nr. 64/1994 um vernd, friðun og veiðar á villtum fuglum og villtum spendýrum með síðari breytingum og reglugerðar nr. 252/1996 um friðun tiltekinnar villtra fuglategunda og friðlýsingu æðarvarps.

Breiðafjarðarnefnd vekur athygli á því að í forsendurnar vantar lögbundnar fornleifaskráningar fyrir verndarsvæðið.

Á bls. 51 í forsendum með tillögu Landmótunar að aðalskipulagi fyrir Vesturbyggð er fjallað um verndaráætlun Breiðafjarðar og ætti sá kafli jafnframt heima í forsendum vegna aðalskipulags vegna Dalabyggðar.

Varðandi skipulagstillögu fyrir Vesturbyggð gerir Breiðafjarðarnefnd eftirfarandi athugasemdir:

Á bls. 50 í meðfylgjandi forsendum er talað um að Breiðafjörður sé *friðlýstur* skv. lögum en hið rétta er að Breiðafjörður *njóti verndar* skv. lögum um vernd Breiðafjarðar nr. 54/1995.

Á sömu blaðsíðu er talað um að Breiðafjörður skeri sig úr þar sem hann sé "langstærsti eyja- og skerjagarður landsins". Eðlilegra væri að tala um að svæðið skeri sig úr vegna óteljandi eyja, hólma og skerja.

Rétt er að nefna svæði sem njóta verndar skv. öðrum lögum, t.d. friðlýst æðarvörp og arnarsetur

á grundvelli laga nr. 64/1994 um vernd, friðun og veiðar á villtum fuglum og villtum spendýrum með síðari breytingum og reglugerðar nr. 252/1996 um friðun tiltekinna villtra fuglategunda og friðlýsingu æðarvarps.

Breiðafjarðarnefnd vekur athygli á því að í forsendurnar vantar lögbundnar fornleifaskráningar fyrir verndarsvæðið.

Vestfjarðavegur nr. 60. Úrskurður Skipulagsstofnunar um mat á umhverfisáhrifum.

Úrskurður Skipulagsstofnunar var lagður fram ásamt bréfi, dagsettu 28. febrúar 2006.

Afgreiðsla: Nefndarmenn hafa kynnt sér úrskurðinn.

Skráning örnefna á verndarsvæði Breiðafjarðar

Lagt var fram erindi Úlfars B. Thoroddsen, f.h. Minjasafnsins að Hnjóti, dags. 10. mars 2006 um hugsanlegt samstarf Minjasafnsins að Hnjóti við Breiðafjarðarnefnd varðandi skráningu á ver- og skreiðarleiðum við Breiðafjörð.

Í erindinu er viðruð sú hugmynd að Minjasafnið leggi fé í fyrirhugað verkefni Breiðafjarðarnefndar og fái á móti að nýta sér þær niðurstöður verksins sem tengjast ver- og skreiðarleiðum í þágu samnorræns strandmenningarverkefnis.

Magnús sagði frá því að hann hafi rætt við Hafstein í Flatey varðandi kostnað við bát og leiðsögn fyrir Hjördísi þá daga sem hún vinnur að verkefninu á vettvangi.

Afgreiðsla: Ákveðið var að Guðríður og Guðrún Gísladóttir vinni drög að samningi milli Breiðafjarðarnefndar og Háskólans í samvinnu við Þórólf og Friðjón. Guðríður mun ræða við Guðrúnu og Hjördísi um að fá verkáætlun fyrir sumarið.

Vel var tekið í erindi Úlfars og ákveðið að Þórólfur ræði nánar við hann um hugsanlegt samstarf. Magnús mun ræða betur við Hafstein um hugsanlegan heildarkostnað vegna fæðis, gistingar, báts og leiðsagnar meðan á verkefninu stendur.

Bæklingur um fuglalíf á Breiðafirði

Róbert sýndi nefndarmönnum bæklinginn. Beðið er eftir korti sem verið er að vinna í bæklinginn, en að öðru leyti er bæklingurinn tilbúinn til prentunar.

Afgreiðsla: Nefndarmenn voru ánægðir með útlit bæklingsins og kom fram áhugi á því að láta gera bækling um hlunnindi á Breiðafjarðarsvæðinu.

Umsögn um tillögu að Aðalskipulagi Grundarfjarðar 2006-2018 dreifbýlishluta

Lagt var fram erindi frá Teiknistofunni Eik, dags. 7. febrúar 2006, þar sem óskað er eftir umsögn um skipulagstillöguna.

Afgreiðsla: Breiðafjarðarnefnd bendir á að á bls. 19 í drögum að greinargerð með skipulagstillögunni komi fram að lög um vernd Breiðafjarðar séu nr. 53/1995, en hið rétta sé að löggin séu nr. 54/1995.

Að öðru leyti gerir Breiðafjarðarnefnd ekki athugasemdir við skipulagstillöguna.

Önnur mál

Vettvangsferð Breiðafjarðarnefndar

Eiríkur sagði frá því að heppilegasti dagur til fyrirhugaðrar vettvangsferðar m.t.t. sjávarstrauma sé mánudagurinn 17. júlí. Ákveðið var að stefna að því að fara þann dag.

Fundir formanns og varaformanns

Friðjón og Guðríður sögðu frá því að þau hafi farið á fund umhverfisráðherra þann 20. febrúar sl. og afhent henni starfsskýrslu Breiðafjarðarnefndar.

Í framhaldi af fundi með ráðherra funduðu Friðjón og Guðríður með Magnúsi Jóhannssyni ráðuneytisstjóra, Ingimar Sigurðssyni skrifstofustjóra og Sigurði Á. Þráinssyni, deildarstjóra. Á fundinum var fjallað um helstu verkefni Breiðafjarðarnefndar og ákveðið hvaða samskiptaform skuli vera á milli ráðuneytisins og nefndarinnar.

68. fundur Breiðafjarðarnefndar

Ákveðið var að næsti fundur Breiðafjarðarnefndar verði haldinn í Snæfellsbæ. Ritari mun hafa samband við Kristín Jónasson bæjarstjóra Snæfellsbæjar varðandi stað og stund. Þá mun Skúla Alexanderssyni fv. alþingismaðni og Guðbjörgu Gunnarsdóttur þjóðgarðsverði verða boðið til fundarins.

Kynningar:

Guðríður sagði frá því að tvær konur frá Vega í Noregi hafi sýnt áhuga á að koma hér á Breiðafjarðarsvæðið til að kynna sér æðarrækt. Önnur þeirra hafi þegar fengið styrk til ferðarinnar og mun hún koma í sumar. Guðríður lagði til að hún kæmi á fund nefndarinnar þegar hún kemur og segi nefndarmönnum frá því hvernig það sé að vera íbúi á Heimsminjasvæði. Þeir nefndarmanna sem stunda æðarrækt bentu á að heppilegasti tíminn fyrir hana að koma og taka þátt í dúntekju væri fyrsta vikan í júní.

Tölvupóstur hafði borist frá henni þar sem fram kom að hún hafi ákveðið að koma í lok maí.

Fundi var slitið kl. 14:45.

Stefnt er að því að næsti fundur verði haldinn í Snæfellsbæ, föstudaginn 21. apríl nk.